

Ucesnik panela na Sarajevo Business Forumu 2016, Gospodin Vuk Hamović je jedan od osnivača i izvršni predsjednik EFT Groupe sa sjedištem u Velikoj Britaniji, evropske energetske trgovinske kompanije koja posluje na jugoistoku centralne i zapadne Evrope, u Turskoj i baltičkim zemljama. Grupacija razvija dva velika investicijska projekta u BiH: Termoelektranu Stanari i Hidroelektranu Ulog.

“Kada pitate zašto investiramo u BiH, odgovor je jednostavan: Imamo ovde velike mogućnosti za investicije u energetsom sektoru. Pravno okruženje i politička stabilnost bi se mogli unaprediti, ali su već na nivou koji je atraktivan investitorima. Energetski sektor je najperspektivniji u regionu, ali okoliš takođe treba uzeti u obzir: Kako naći balans? Mislim da je odgovor jednostavan. Mi smo dio Evrope, kad kažem mi, mislim na BiH, pitanje je trenutka kad će formalno postati dio Evropske unije, ali geografski to jeste. Naše iskustvo sa kineskim investitorima je odlično, završavamo zajednički termoelektranu u BiH, svi parametri pokazuju da sve ide i iznad dogovorenog, jako smo zadovoljni da možemo svima preporučiti tu saradnju sa kineskim partnerima koji su spremni, ne samo ponuditi ugovore i finansiranja, zajmove, spremni su razgovarati o dioničkom učešću”, rekao je Hamović. Energetika je strateško opredjeljenje za investiranje u BiH u narednom periodu za Vladu FBiH, rekao je Senad Salkić, savjetnik ministra energije, rudarstva i industrije FBiH. Podsjetio je kako je jučer, u okviru prvog dana SBF-a, potpisan veliki ugovor o gradnji Bloka 7 Termoelektrane Tuzla.

Za nastavak velikih energetske projekata u BiH neophodno je usvojiti jednu energetske strategiju koja će harmonizirati zakonske akte koji su “najveći kočničari investicija”. Darko Horvat, ministar poduzetništva i obrta Republike Hrvatske, podsjetio je kako je Hrvatska ulaskom u Evropsku uniju prihvatila sve direktive Evropske komisije koje će u skorije vrijeme biti implementirane i u susjednim zemljama stoga će se cijela regija ponašati prema istim, evropskim pravilima.

Predstavljajući energetske sektor u Hrvatskoj, Horvat je podsjetio kako ta zemlja trenutno blizu 60 posto potreba za električnom energijom namiruje domicilnom proizvodnjom, dok manji dio uvozi. Kada je riječ o proizvodnji električne energije iz obnovljivih izvora, to je 13 posto uz činjenicu da se Hrvatska obavezala da taj udio podigne na 20 posto do 2020. godine.